

40 PASS VAN DE SFROS

Come corsari della Bovisa, sura un trenu del venerdì sira
omen o quasi vegnüü de la melma per imparà a restà nel catràmm
Quajvoen l'ha stüdiaa per mea ciapà bott, quajvoen l'ha crumpaa una cravatta e un giurnaal,
quajvoen l'ha pruvaa a mett soe una divisa, ma l'ha tegnüü dumà la pistola...
Trii rembambii in soel puunt del naviglio per pruvà a trovà un quaj riflèss
che nustalgia dell'acqua del laagh ma mai de quela giò in del büceer
Quajvoen l'ha sfilaa cun scià una bandiera, quajvoen l'ha sfilaa dumà i so müdaand,
quajvoen l'ha pruvaa a guidà una pantera, e l'ha tegnüü dumà el lampegiaant...
e adess che i sann i culuur del metro' e adess che i sann in'de l'è la toilette
se senten padroni de quell tocch de umbriia tra el marciapè e'l Domm de Milaan

**E forsi per luur l'è una gesa troppa granda
e forsi per nà deent ghe voer anca el telepàss
e bisognerà imparà una preghiera cumplacada
e bisognerà imparà una preghiera de città
per sta bela Madunina che l'è stüfa de brilà...
tropp luntana e piscinina per pudè ancamò scultà...
trii cumè luur**

E forsi l'è nada cume l'è nada o forsi cume la duveva nà
trii omen, trii coer, trii para de ball, trii destin incrusaa a uncinett,
quajvoen l'era stüff de purtà una bandiera e l'ha faa el prufessuur a l'università...
ma una matena hann trovaa i volantini e un mitra scundüü in de la sua cà...
quell'oltru a l'era un prufessiunista senza stüdià per fa el gigolò
a l'è scapüsciaa ne la dona sbagliada e in un sacch de coca scundüü in del crüscott
el teerz el faseva la guardia del corpo e anca l'autista per un senatuur
e in un sira de candell e butègli per difeend na pelanda l'ha picaa un assessuur...
e adess che i sann cume l'è la galera che gh'hann pagüüra de nà a la toilette
i fann un brindisi alla buona condotta tra el marciapè e'l Domm de Milann

**e l'è tüta per luur questa gésa troppa granda
e forsi per nà deent basta fa quaranta pass
una preghiera per Bob Marley e per el nonu in paradiis
una candela a Sant'Ambroes, una candela a San Vituur
e a sta bela Madunina che la riess amò a brilà...
la sarà anca piscinina ma la riess anca a scultà.....
trii cumè luur...**